



## 家己栽一穰較贏看別人

阮阿母踎後尾埕飼精牲仔，不 sám 時雞卵、鴨卵祛規籃，厝內定定有雞肉、鴨肉通食。伊閣佇厝邊的空地仔種菜，菜若著時，往往生炭甲食袂去，攏愛拜託親情朋友鬥捧場。今年的風颳真捷來，「菜蟲」順風勢共九層塔漲懸價，一斤喝甲 500 箍，毋過阮兜發甲滿滿是，連跤路都崁無去。

我定定綴佇阿母的邊仔鬥無閒，就按呢種著伊的巧氣恰骨力，跤手袂混沌，親像印度電影「三个癡頭(3 Idiots)」的男主角全款，有一粒好奇心，真愛變東變西。鐵銅滴水糊『sir-lí-khóng』，馬桶漏水換塑膠皮仔，油漆壁面、批桶、欄杆恰鐵窗，共電風、門鈕點油去銼，鬥燈座，鎖架仔，洗水塔，遮的攏是小可代誌爾爾。錢銀儂趁，簡單工課家己包辦，毋通萬項向(ng)別人。

日常生活定有脫箠的代誌，拄好昨暝運途行佇卯字，我當咧摔(siang)大眠，一潑水袂輸 tsih-tshuh 的「潑猴」，雄雄對頭殼頂拚落來，害我趟童拍生驚。兇手就是彼台分離式冷氣的室內機，無張無持煞泄尿漏 tshè-tshè，倔強的冷氣水涌涌滴。心內叫苦！趕緊關掉電源，拔掉插頭，搬請水桶恰破布來鬥相共，毋過愛暈神猶袂走，暫時清彩舞舞咧，徙岫換鋪繼續睏。

隔轉工是拜五，趕緊敲電話討救兵，服務站的頭家講：「規隻室內機仔愛拆轉去洗，連工帶料三千箍。拜六、禮拜師傅歇睏，後禮拜才閣約。」熱沸沸的刺疫予人大氣喘袂離，僥倖煞拄著慢仙童！是欲聽候到底時？殘殘家己踈落去較實在。上網看人按怎變弄，掠著銳角了後開始動工。一座『a-lú-mih』的馬椅踎好勢，十字的『loo-lài-bà』攢予便，三支螺絲掙落來，三片塑膠殼寬寬仔拆掉。探頭一下看，欸！水管窰牢牢，水盤有影溼滿滿。先搗大枝軟管插入去水空歎風，哇！水無消，顛倒噴甲我滿面全豆花！改用白鐵仔線貫入去水管絞拈，拂甲大粒汗，細粒汗，臭 konn-konn 的積水猶原無顫無悶，仙喝都毋振動。

舊招無效，緊換新步。騎『oo-tóo-bái』來到五金行，好運相著一條 17 尺的『逆滲透』軟管，頭家俗俗賣我 50 箍。這條白鑠鑠的軟管真猛掠，勻勻仔穿過 16 尺的洩水管，抽掉了後隨發出一聲 kú-luh！兩聲 kú-luh！有夠好聽！水盤焦焦，積水攏無去矣！修理好勢的冷氣 sng-h-sng-h 吼，我的心情 tshit-pōng-pōng，歡喜跳『tshiá-tshiah』！「家己栽一穰，較贏看別人。」阿母講的確實有影！

作者：黃文達

### ☆詞彙學習☆

【跤路】kha-lōo：行進的路線。

跳起來。

【巧氣】khiáu-khì：靈巧聰明的氣質。

【慢仙童】bān-sian-tōng：做事慢半拍的人。

【混沌】hūn-tūn：遲頓。

【馬椅】bé-í：「A」字形的梯子。

【趟童】tiô-tāng：乩童起乩，比喻嚇到身體